

敬日草卷七目錄

記

樂清縣東塔山鐘樓記

重建周宣靈王廟碑

清源書記

萬安縣鼎建鏡虹閣記

德化縣新建神霄塔記

寺碑記

代擬司禮監碑記



曾使君碑記

莊方伯碑記

雷廟記

禮闈小記

泗州基運山小記

游宮市小記

天甯寺小記

三殿鼎新賦

林爲馨年兄筍堤集序

報國寺雙松小記

石鼓小記

○蒲井小記

劉園 王園 資福寺游記

建溪石小記

記紫雲雙塔游

○袖清源石小記

記圓通菴舊游

重修福全家廟記

展祖小記

鼎建福蔣世室記

華陽三徑小記

觀歌器記

栖綠書院記

舟峰雷薦亭記

封御史馨齋黃公柳菴祠記

讀廬墓記

樂清縣東塔山鐘樓記 家君命作

余守甌之五年家 恩擢分臬豫章臨發而樂清

士李應鏘輩前請曰前東塔山與磐石衛爭鐘實

我公拆獄是時師生武人千百為羣各負其是而

鐘在磐石武人之墨守幾於坐勝微公督之貼鑄

不兩完也雖然鑄難須也諸生業別購得之永嘉

深谷中亦忝定間物其音礧砢其理貞堅因築樓

于東塔山之脊而棲之公不可無記余猶記辨鐘

時兩造闕不鮮密勅人募鐘陰得靜慧院三古篆

知非東塔及磐石有也一笑而散於是鐘歸磐石而令衛官軍捐金佐諸士鑄各意得去夫器以久為貴與其購也賢於鑄也遂記之曰按志東塔山高二百五十仞峰形象筆稱文峯識曰青龍角財富足青龍聲邑井與熙寧間葛令逢遂移九牛山之塔于其巔而樹鐘焉以為之角與聲紹興丙子景雲書蒙明年王梅溪先生射策第一相詫青龍之應云

明興道韻熙洽益斌斌多雋起若吳恭毅高襄簡侯方伯諸君子地靈人秀克繩芳武嘉靖末而鐘亾矣父老曰亾于兵是以有磐石之爭余笑語諸士曰夫以熙寧來數百年之文運盡舉而委之宋之一蠡追諸士視鐘微太重乎哉雖然其在古有之夏之龍箚簋殷之崇牙周之璧嬰皆為鐘設也自黃帝鑄十二鐘以和五音夔典樂教胄子有笙鏞辟雍文王之學也有賁鏞古先王於樂未嘗斯須去而學尤急釋名曰鐘空也空受氣多故聲大白虎通曰動也陰氣用事萬物動成八音之數金

為長金之動物鐘為大夫鐘者樂之君也律之本也然則鐘又焉得輕也且夫世之花宮琳宇以奉金姿者眾矣方石淥池侈之曰帝獻而圖鑿鑄鑄刻獸鑄蟲符玉律而雜金風者僅以當柰苑之鸚鵡車而已試以東塔之鐘與茲樓也繁重而論其不賢于伽藍之記也者幾希乃為之銘銘曰維樂有山館御靈囿厥東東岑西耦天柱謝監末章葛君斯作梅塔主者設業設虞呪松千根樹銅九乳青龍夜鳴商雲晨覩梅溪先之以闢來許睠言遺

音載懷擊拊列雋子來守為若王乘岨挺基干零發杵鯨魚欲吹鸞歌鳳舞豈繫佛栖維儒亨土勗爾莪菁克光鐘鼓

重建周宣靈王廟碑家君原彙

甌故有開元寺在文廟之陰左掖爲周宣靈王廟
歲久傾圮湫隘不治拓而新之自郡別駕沈君始
沈君爲余言某以事至開元寺過宣靈廟初不知
何祠夜夢入一神宇神金冠絳衣色若重棗某前
叩神起座類見接者醒而問左右以宣靈王對視
廟宛如夢中心異之以語於衆衆遂採木鳩工子
來若靈使其某亦捐俸佐之今觀厥成矣願得守記
其緣起余聞之儒者多不言鬼神然鬼神何嘗無

也易言彌綸天地之道必先言鬼神之情狀迺其所指鬼神不以形體爲物而物曰精氣不以魄降爲變而變曰魂游則其狀可知已精虛化氣精迺不散魂游化漠魂迺不滅不物之物無變之變此天地間之真鬼神也人非神不靈神亦非人不依而神之接人又往往不覺而於夢夢者人之魂與魄交而所以合於鬼神之道也然亦惟志氣清明者爲能有之高宗之夢帝賚也帝真賚之也孔子之夢周公也周公真見之也聖人之夢也他若齊

景公夢五丈夫鄭簡公夢黃能虢公夢神人執鉞而立西阿或夢而吉國以昌或夢而凶國以亾神率先告之而歐陽公與丁寶臣夢入黃牛廟見石馬隻耳尤奇寶臣旣判陝州而歐令夷陵入廟迺相與驚歎以爲隻耳馬亦前定况其大乎明有官幽有神官聽於君神聽於天皆天地間善淫之司命而有司法之所不及神能陰毗之故神之見夢於有司非第求新其廟貌而已特以其福善禍淫之意假之有司以信而士庶人亦相與慕義不敢

爲非此則易所言鬼神之情狀可以質而無疑者
矣按記宣靈王周姓名洪字仲偉新城綠渚人母
汪夢龍浴金盤而生天性孝友膂力舉百鈞亦異
人云然記所載不同一謂汪構危疾聞徽嫠有顯
神促宣靈往禱宣靈行次衢聞母訃摧裂僵逝于
舟中以孝歿一謂宋端平間胡元雲擾屠慘中原
宣靈奮布衣謀聚義兵北伐會有撓其計者宣靈
憤恚以忠歿嗟夫歿孝歿耳歿忠亦歿耳宣靈歿
而殉母則可以教天下之爲子者如歿而殉君則

清源書院記

二雲曾使君鎮泉之五年而移節莆臨發與銓部
林公爲磐暨不佞璟會士紳于一峰書院證文成
之學而新使君陸公適至又宮允黃公幼玄亦自
漳赴 召過泉因偕郡守孫侯司理區侯邑令戈
侯再會登歌鹿鳴南山泮水三章宮允起拜曰周
行示我矣銓部曰基我邦家樂得賢實繫今日黃
布衣曰美哉長道之順也小大從公匪怒伊教於
是璟颺言以爲雅言周行魯言長道周禮盡在魯

矣泉夙稱海濱鄒魯自紫陽倅同安道始有聞入
明而吉水羅文毅以抗疏左遷復相與講明正
學其後吾邑蔡文莊陳紫峯諸鄉衮斌斌蔚起而
近李文節林司徒何司空繼之泉學爲盛然文毅
特市舶謫官耳非有泮林鸞旗躡馬之華足號召
也諸先輩雖爲桑梓君宗亦不聞有當道身爲之
倡聚一堂而商朱陸同異爲聖門究任仁指歸者
有之自曾公始公生文毅之鄉少游南臯鄒公門
稱入室其學以良知爲的以弘毅任仁爲家派清

真寡欲萬物不能移出而爲政壹意奉公鋤強植
懦心力周澈屬海寇劉香蔓毒三省公獨決策遣
將入粵破殲之功第一復密擒嶺後山寇弭亂未
然爲福於泉甚大而公絕口不言也曰此小醜耳
王文成有言除却良知別無事功氣節矧區區哉
蓋與余輩談學而神王也筍江紫帽山水之外獨
有性命相商若不知酌水之爲清拔薤之爲烈蕩
山海氛祲之爲奇者卽而眎之一壘鹽措大絕無
色味之醜醜而其憂國傷時熱腸激論忠義之氣

往往形於眉睫嗟乎此乃公所以爲學也今海內學人不少然其行常不如其學而不學者其學又不足以爲政於是學與政分途而三代上真儒之効不復見于世其流弊遂有不勝旣者

聖主嘉意本教近於小學社學 特諭申飭而日御細旃與講臣容諏治理德意甚盛夫朝廷之有文華卽州閭之書院也

上日講而下諱講何歟獨必如曾公廼可講耳文毅在當時旣不聞賢士夫與游者爲誰諸先輩賢

矣而又不遇知學之使君則夫以余輩而遇兩使君與諸大夫揚扆于一堂之上恐亦文成後所不能多覲也銓部雅言曰氣而宮允與余嘗爲榕壇問答皆與公任仁旨互相發乃余輩之所以重公者又不獨以其講而已鹿鳴南山之詩必遡德音日孔昭曰是茂而泮水直曰克廣德心至獻馘獻功皆受成釋奠於學蓋學之用大矣公有德心廣之是在異日哉書院在郡治北以近清源故名清源書院舊祀一峰先生卽文毅公倫成化二年進

士第一人也左爲公講學處諸士民因築堂奉公誌不朽云公諱櫻江西峽江人萬曆丙辰進士董其事者耆民吳養正余梓等例得並書

萬安橋鼎建鏡虹閣記

崇禎戊寅春萬安橋新建鏡虹閣成晉江湯侯惠安李侯以其事諭史璟曰是直指張公意也公按泉從橋謂架江海雄勝爲九州冠而腰有小嶼嶼有城尤奇城內舍稍庳隘宜有高閣以稱之時李侯方自惠署晉公遂捐俸俾擴新未幾湯侯至因合筴躬行營表各佐俸百金卽舊址爲廳事上增三楹爲閣高出睥睨旁爲耳房供燕息翼以廻廊旬僕厨從各有寧次木巨而堅垣甍言言一切

購募皆眎民間平僮董以土著之好義者不遣胥不持檄費省工倍閣竣而民不知郡人美之爲之賦子來君子曰是舉也具三善焉泉水國也夾以兩江筍江縮西北水入海有石筍順濟二橋雒陽江縮東北水入海有萬安烏嶼二橋皆鞭石潛犀力相伯仲然而萬安獨顯當時至進圖爲神宗嘉賞而故老相傳謂忠惠揆日鍤趾皆預檄江水之神以至輦石懸木遇危險輒得神相址石所繫蠲輒封之王公慎中謂賢者之所爲人樂其成而賴

之險盡爲用矣其功在封守斯三者於法皆宜書故曰一舉而三善備也然而封守大矣若夫枕雙陽面滄海峰巒環匝潮汐喻嘘禽魚卉木之觀煙蜃風虹之態登眺之美則不可勝書也昔諸葛武侯所至治官府次舍橋梁道路藩籬障塞皆應繩墨一日之行不改其初公觀風度橋上亦暫耳而卽圖久遠若此計是閣與橋終始則公亦當與忠惠並傳而兩侯又能承公德意於二邑界協恭共濟下不擾民上不耗官幾於古所稱不日成者宜

乎有子來之賦也鏡虹公所署名蓋取虹勢巨天水光如鏡之義而公之風采赫濯澄清山海之槩亦具露一斑矣閣坐乾向巽建於春正月十八日成於三月十五日廣三丈高二丈六尺深三丈八尺張公諱肯堂華亭人天啓乙丑進士湯侯諱有慶長洲人崇禎丁丑進士李侯諱沾華亭人戊辰進士而當戊辰之歲有雷電從閣址起繞城三匝裂雉堞者三實爲鼎新之堦云記之日爲四月旣望適兵憲武進陸公鄉正以入賀復任而鍾祥劉公彥來爲郡偕郡丞陳侯頤達別駕虞侯國鉉節推姜侯應龍樂觀厥成於是石之役尤屬意均可書也董其事者貢生蔡嗣銓嘗以千金助邊詔旌其門曰忠義者也諸生吳其泓張廷薦皆附橋人亦有勞得附書


德化縣新建獅霄埕記


蓋朗寧侯治德化之三年而鳳翥山始有獅霄
埕云山舊有西南兩埕稱始何堙久而興故美而
始之也志以龍角鳳光爲譽髦登進之應又曰水
畫丁羅簪纓以是侯首建埕次濬溪溪籀丁有尾
矣特書埕何埕重也侯捐俸百四十鏹百以埕四
十以溪而埕力鉅別募三百鏹佐之溪則埕之餘
也旣成署學傅孝廉王君某帥諸生謁史璟記按
嘉靖中有緒侯者建駕雲亭於龍潯山之上王道

思先生記其事以地靈為人才之輔而璟家大夫
令江山時嘗築九清鹿溪二梁及建牙海北則亦
有起秀增之役其意與林侯合然竊以人才者士
之所自砥也山川何權焉天有所域人自靡然而
受之間欲以意與之衡又不能移山走水奪智陋
而易以菁華則其勢始拱而待之有司有司之權
行而山川之權遂輕矣然而非真循吏視其子弟
若吾塔蘭芝視其山與水若吾几案間物而必欲
為桐鄉樹千百秋不朽之舉則亦相與晏然坐以

聽之山水而已吾郡於閩為神臯文獻甲四海獨
德化居萬峰間自丁岡卿以秉銓顯宅一二右姓
外閭寥寡色議者謂鳳翥於方直巽宜筆峰若戴
雲五花繡屏之秀可攬也且夫丁溪在宋時嘗一
夕雷雨篆溪為丁有徵矣兩者實待侯而辨而侯
遂身肩之不煩公私未浹歲具告成績今試梯鳳
翥之巔而望澄漪如練一從一衡者溪也疏鑿屬
於埕之椒者雲龍橋也與浮圖巋然相對如龍之
交逞其角而出者駕雲亭也寶鐸鳴風水雲萬頃

若唐人所詠鴈墪曲江爲一品白衫題名宴櫻之處而遠近之色以其秀環而映者九仙諸名山也於戲不其鞞與蓋史所載如辰陽長宋均蒲亭長仇覽率以興起覺序爲美而召父在南陽行視水泉開通溝瀆起水門堤闕數十處林侯循漢循風也哉侯潔修皜然塵表家傳令譜稱廉能而長公尤第讀書署中歸遂發省解得山川之助爲多且見邑人士之繼起也墪始天啓癸亥七月竣於甲子五月高七十五尺周倍之凡五級翼以扶欄內層爲堂容數榻蒲司李祁公處佳以查盤至嘗登而落之侯諱大儁鄉進士隆安人王君諱大覺及司訓王君國禎皆晉安人諸生周開年林楊實董墪役而可其議者巡道前大叅詹公士龍永豐人丁未進士今大叅楊公公翰溧水人甲辰進士郡守沈公翹楚慈谿人己未進士署郡司李簡公欽文新喻人壬戌進士例得並書





銘曰佛恩一子視三千心如瑠璃燭無邊香雨
注甘露懸我皇在宥亦如然誰鬯皇仁作天
示現功德不唐捐有赫璇宮帝座躔佛日再
曉霽人天八龍兩鶴蓮花前芳祠金峙寶界
連宰官護法也安禪長傍珠幡結大牟

擬司禮監碑文代

司禮監既新修因樹石本監署中為某公碑而徵
 記於余且曰掌印王公等皆荷 聖眷簡掌各衙
 門印務而某公為最恩廕屢頒千古曠典宜銘在
 景鍾余不文辭不可竊惟天垂象聖人則之內宰
 四星在帝座之西自周漢以來世難其選 明興
 設監十有一而司禮特為要地凡朝廷大典禮及
 在內監局司庫在外諸司章疏圖書靡不與聞其
 公廳庫藏內書館并各作房則專設提督一人董

新刊... 卷七
之出納綾紗紙劄筆研諸物印造五經書史成造
制勅勘合精微而監官典簿爲之屬其文書房則
顯備傳宣 聖諭掌發章奏故有南北司房之分
皆參密帷幄口銜天憲於權寄甚親且重非恭慎
小心克副 上旨者鮮能勝其任而愉快以今觀
王公諸人忠孝性植共矢匪懈拱扈龍衮蔚若列
星之衛北辰而公所以敬承于內自
今皇嗣登寶位大婚鹵簿 陵工 殿工無不畢
力助勦丕著成績然猶遜不自居曰皆 聖天子

威靈所變化也美哉公之名於是爲烈矣從古宮
府本自一體而司禮實關天下安危然其下者能
階天下以危而其上者亦未必能與天下以安今
之赫然一新華夷載服雖我

天子聖神文武世德作求而非公其誰左右之語
曰人貌榮名豈有既乎天壤間可不朽者獨名耳
富貴福澤之盛在一時而名則在千古久於川嶽
光於日星故古之帝王卿相無不以名爲寶而求
之禁掖之內惓惓爲不朽計者鮮矣夫寧知名不

朽則富貴福澤亦與之俱不朽乎天子既褒公
勳光寵翕赫而余所爲頌公者則尤羨公有千百
欲之名而非徒一時之盛爲世所艷稱而已諸公
曰善遂勒之石而記之

曾使君碑

兵使者峽江曾公鎮泉且四年司銓以公資望疏
移鎮楚再移蜀

上皆不許有旨令別推泉文武吏民始聞公它擢
而懼走兩臺攀留者數千人相戒斷橋閉關尼公
行繼聞而喜以爲

聖天子睠閩深將久任公非真知公不爲閩借公久
也相率立再借亭於海上已復就城東構亭而謁
余記余久熱筆研則副將鄭君芝龍暨黃守備得

陽輩固以請曰比者海上之功公指縱也史宜大書若它惠政可特書皆史職也余謝不敏蓋嘗讀國僑學然後入政未聞政學之論而疑之今言學者本傳說言仁誠一本伊尹言天言敬脩本咎繇言止言幾本禹至周名而性命大鬯數聖人於學則學祖也其於政則卽以政學或終其身守一官不易或一身兼數器而不辭淡不標廉照不炫智斷不尸勇極而至範天圍地財成民物不居功賞堂皇之外別無壇坫饑溺相對卽爲導師蓋直以

仁天下爲學以雲行雨施爲龍德而非不雨不雲如尺蠖然可以題之龍也然則政與學果有二歟余嚮耳公名咸謂趙閱道包希仁一輩人比見公神志清明直內方外開顏見膽和氣益人知公真聖學久而習公政其眎貧僻窮丁不異孩抱逼欲起之溝而肉之也悍少年倚豪門鴟穴捕治不少貸亡敢居間其黠者飾羸狀求哀察麁簡孚亡能蓋也海舶珠奇若珠琥象犀哆囉沉檀之屬卷握可富唾若糞土卽贖緩麾不復顧清源茶針并亡

別物也四載于茲舉部內大夫士庶胷中各有一使君師保之臨焉以故泉吏治爲八閩最而衿紳亦爭濯磨習氣以儀式公暇則相與談任仁之學廩廩德讓還鄒魯觀矣諸將軍曰未也海寇自鍾李授首後劉香最桀蹂躪三省沿海無寧歲公推心決策遣舟師南入粵鏖戰破焚之降其殘黨無算香父北走浙亦遂解散海數千里不復波而羅溪山賊謀竊發公先期密檄擒定四境安堵非公疇力夫惟能將將是以用命不然者百熊虎渠能

爲乎余曰諸君第知爲將不知爲學也曩陽明子嘗用之矣神武不殺本在洗心不洗不能藏也不藏亦不能神也故曰齋戒以神明其德要歸之無欲而已無欲則仁仁則雖殺不殺兵行而民弗知飲至而心不動可升可沉無伐無悶斯之爲聖人之學也比西比流賊披猖蔓延五省

聖天子至避殿減膳以罪已詔百官公發憤請帥鄭將軍北討忠義貫日月之氣使頑懦人無處生活嗟乎斯世有公一人正不爲少而况有

聖主震動之于上者哉公一介不取亦不與故久不遷然再遷而再不許則

聖主知公深且爲閩借公之久異日大用公將自有屬而泉人相與尼公之去幸公之留以私爲一隅地則亦過矣南臯鄒先正有言頂天立地只靠一心心淨卽肩頭自豎脚跟自定國家氣運全繫我輩公取大于鄒故能以政爲學章章如是而趙清獻聞雷鳴書柱礎曰一聲霹靂頂門開喚醒從前自家的余每聽公之言輒誦此詩以當先醒

莊方伯碑

先生諱應禎字希周惠安霞曾里人也弱冠舉嘉靖丁酉十年成進士授紹興推官外艱補袁州晉刑部郎改尚寶司丞出爲廣西叅議部左江晉湖廣驛傳副使改備兵漢黃晉廣西叅政部蒼梧再晉按察使廣東右布政使歸而樹德於鄉鄉人思之旣祀於學宮復勒之石蓋先生故竈籍歲輸官課有司議額外增編下戶苦不支洵洵告急公力請蠲之部檄取北鎮布屬兵燹杼柚久空機戶惶怖

無敢應公亦爲請命得免而役之大者曰留公陂
晉惠合流霑溉可萬井爲洪濤囓久不修公言所
司捐金先之畚築告成兩邑均拜賜焉昔孫叔敖
作期思之陂而雩婁用贍秦開鄭國漢作白溝而
關中號爲陸海乃至一鴻隙也天帝以爲龍淵童
謠託於黃鵠此豈小事而公以鄉先生爲父老子
弟造不貸之福使之奕世生稻梁長禾黍而歸其
賜於公較當官者不尤難乎卽鹽布之供所蠲無
幾然波民間卽鉅萬矣宜鄉人之久而思也先生

孝友仁篤慈惠溫恭奉兄姊拊甥姪具有恩意若
乃懷恬砥節介志正辭獨秀風塵激貪勵競其概
有足述者袁州爲分宜桑梓稍脂韋立致臺諫公
被臺薦五矣耻濡權門蕭然自遠以得冷曹比守
尚璽十年與分宜子聯家復補外且得粵西斯固
直道之效也其在江左却墨吏甑中暮金平冤獄
定貴縣五山諸徭在楚值景邸內徙供億囂煩
策馬馳列郡綜畫明辨且條郵政八議疲繭爲蘇
而黃麻當汗汝之交長江下接潯蠡劇賊出沒尤

難治公簡將練卒擒其魁巨江漢清焉 勸世子
橫於部中捕治其人卽 世子所免不可其在梧
故事諸經費取辦商僉務爲節省不浚求又故無
廨宇捐鍰庠造一新在廉訪覆 靖藩奏計之獄
在粵東攝司篆清出納諱持廉約有吳隱之風可
謂正直鞠躬君子矣公生正德卒萬曆省己卯卒
二十餘年而孫毓慶舉辛丑進士繼爲粵西右方
伯所歷官多公舊遊地清白世其家而公之夫人
洪百齡進一親見其孫貴顯故尤爲鄉人所頌說

且信天之可必以爲仁人真有後也公孫以 覃
恩晉公階通奉大夫不佞某備員綸坡實草 制
習其行事故於惠人之請而序次如左其辭曰維
惠多良襄惠傑立方伯鵠起秉心淵塞蚤翔皇衢
素絲耻墨權氛設羅義不受弋避膩就涼長離振
翼游敷外服啓跡彌清悍藩斂手賦吏解纓揮羨
却潤抗志謝榮風尊維社德尚戾桑枯農色飽窮
戶體輕孝友爲機睦淵爲緯詒厥槐萌奕葉增翠
乘箕者神誦輿者愛衛鼎晉鐘摘光剖粹史作銘

詩以副金匱

卷七

雷廟記

雷廟者雷州陳刺史之廟也而以雷額者雷胎也
雷州故梁陳間曰南合州州七里英靈村民陳鉷
無子事捕獵家有異犬九耳而靈將獵卜其耳動
之數爲獲獸多寡未嘗差爽一日九耳俱動鉷喜
必大獲集鄰戶十許家共行而犬繞吠叢棘中日
西不出因相與斬棘入得巨郊圍尺餘殼青碧色
恠之良久雲雨暴至四塾昏沈雷劈郊開見一兒
兩手有異文左雷右州鉷遂禱于天以爲子男陳

大建三年男拜本州刺史有善政歿而威烈常爲
霹靂擊陰過及物之毒于民者州人就其村立廟
塑雷神十二軀應十二方位有冠劔刀鉞輪鼓電
火之飾如奉真雷馬梁乾化二年秋颶作忽失二
大樑落英榜山中石神之西疑若托風雨擇地而
遷者因移廟于其山自是益靈異往往見幢蓋音
樂直入正殿龍爪印地久而不滅虎盜放生雞羊
輒震死如此類者甚多石神亦遂爲廟中土地予
思雷行天威之吏無地不有而此獨以食其州何

哉且雨寄其神於郊中之人以赫濯於世又不可
曉也然古固有日月入懷鳥卵沈木皆化男子則
陳氏之說固有之河圖帝通紀曰黃帝以雷精起
而季路之勇也或云感雷而生又在陳氏之前已
隴言今年春雷起有物如鳶突入人家擒一人跪
之通衢鞭背者三而碎一葛戶人欲免於雷勿恃
橐蜚飛魚而可噫此神之教也神諱文玉洪武中
盡革宋元王號改封曰雷司之神其名州者唐貞
觀八年始也萬曆甲寅除夕

禮闈小記

崇禎元年戊辰禮部當會試以考試官請二月五日丁酉命下大學士施公鳳來張公瑞圖爲考官予叨與同考是日午儀部主事高公有聞以幣至家行二拜卽報謁亦二拜初六日戊戌入門謝恩小飯闕右門趙內官家出東板門易吉服候大主考同宴禮部主考上坐史官及給諫對坐部屬旁坐宴甚盛遂迎入院至公堂與提調監試揖卽鎖院入簾予房在西第三間晚同年合飲

爲傳公冠劉公必達李公紹賢張公四知謝公德
溥朱公之俊共七人皆同館七日會經堂會揖出
聚奎堂揖主考遂分經予得詩二房各房交相訪
午下詩六房會題同飲八日會揖用襯衣自是早
揖皆襯衣是午二主考遍視各同考房扁諸後房
內吉服偕詣聚奎堂序坐四圍嚴鎖無漏處故事
主考上坐同考翰林年深二人爲領房對坐餘皆
傍坐揭四書論語爲十籤得述而泰伯二章大學
爲二籤得聖經至治國章孟子爲三籤得上孟各
房四書各擬三題上之主考主考復每題摘其三
納筒中授領房何公吾騶聞之大學初得帝典曰
克明峻德予私語傳公曰

上初登極東西虜警克明二字如何傳公遽宣言
之主考卽易以康誥全章又犯克明二字因再易
身修三句論語抽唐虞之際二句上孟抽國人皆
曰賢四句詩經六房合二十四題則主考信筆用
其四他經亦然遂擺宴諸刻印匠皆在堂予輩督
之不停手坐達旦疲甚刻版僅三副二鼓刻始竣

印六千紙黎明始竣其用黃紙書題納筒裹以黃
袱者當進呈擊板揭簾大宗伯至立簾下距丈餘
執事者以筒授宗伯捧而出不交一言禮部提調
官領題出散諸士子等乃揖而退十一日出二場
題十四日出三場題皆如之十二日卯至十五日
酉初場卷次第到予房得卷二百八十四內南百
三十一卷取十一北卷百十卷取七中四十三卷
取二共取二十人備卷六人中卷有四皆奇而扼
於額乃別房有申卷五十而取一者似不均二場

卷十六日至十八日次第到三場卷十八至廿一
日次第到然去取則二十內已定矣九日午後大
雷雨晚詩六房同飲十日六房及魏都諫復飲晚
七同年飲十一日魏及吳都諫過飲此後卷到各
齋心披閱不復聚飲矣十五日主考索卷急以四
卷先之餘亦續送廿一日定批又互批廿三日盡
送主考看詳批定名次廿四日交落卷與掌卷官
中書裴公君賜田君佳璧是午填草牒廿五日各
房交相訪外簾送墨卷入各房以所取硃卷細磨

對畢午刻主考復徧視各房各役房內嚴鎖如
出題時與同考吉服出聚奎堂知貢舉禮部二公
監試二侍御皆入序坐主考同禮部四公上坐二
領房二侍御對坐經房各一榻手拆墨卷彌封同
硃卷送大考填姓名于卷副考填姓名于紙隨填
隨刻以第二十一名爲始填畢又自二十名逆填
至第一防爭也予首卷曹君原擬第三魁而易黎
卷禮記張卷皆佳兩主考連日擬元不決臨榜定
曹冠軍予出榻力辭蓋各房多欲得元而予念前
科有以爭元獲戾者宗伯孟公紹虞曰人爭元公
顧遜之耶施公曰此吾鄉名士張公曰此公事不
必爭亦不必讓予遂以卷授提調監試而退擺宴
坐達旦四鼓填卷畢隨填備卷子手六備卷甚惜
之猶不忍批倒也廿六日戊午早揭榜先具黃箱
二各裝題名一冊主考同考望闕五拜三叩頭
進

上與懿安皇后朱箱一冊進中宮而京師人
以報榜希厚利先賂印匠多印名紙藏衣間伺啓

闇疾馳去予竟不得一冊既放榜則曹君名大歷時流予幸追冬烘之誚遂馳歸謁母陳恭人廿七日禮部送宴入朝謝恩是役也予焚香求真木凡落卷必五覆又七同年時相過評隲爲快而與李公紹賢連房朝夕尤還往無間以爲國家取士之典最慎重其防衛嚴密除鬼神外毫無可測而以求士之故優異主司我輩恐自菲薄非人也初七日下午馬宴十一十四十七俱有大送小宴廿四日上馬宴計二大宴三大送三小宴皆折價又房中米麪酒果器物纖悉具備而每日送程亦不貲它費尤鉅皆禮部事各房給諫有帶副都御史銜部屬有帶太僕寺卿銜者古未有也然行坐皆在史官後亦創見

泗州與盱眙縣夾淮而居相距五里許度浮橋從州城外沿淮北行十里渡小河即基運山也山一片皆漫土嘉靖中始改稱基運云易輿以馬入御碑亭佳氣蔥鬱古栢萬株數百步為紅門旁即祠祭署也世襲奉祀朱自讓來迎引入殿前行五拜三叩頭禮殿前豎石闕四石獸十六石馬六內臣控馬二朝臣十四殿內三黃幄置神座

神座

德祖玄皇帝后居中南向卽

高皇帝高祖也

懿祖恒皇帝后居東西向

熙祖裕皇帝后居西東向其自陵寢神宮

御

器一如孝陵及天壽制殿門後卽

熙祖陵所稱萬歲山者也

高皇以世湮遠不輕祖故斷以

德祖爲肇基而

德

懿二陵經兵燹亦失其處

故止于熙陵寢殿行望祭焉龍脉西自汴梁繇

宿虹至雙溝鎮起伏萬狀爲九崗十八窪從西轉
北亥龍入首坐癸向丁一大坂土也殿則子午

陵前地平壠數百丈皆高數尺繞身九曲水入

懷從御橋東出與小河會又前爲汴河其左爲

陡湖爲二陳溝又前卽泗州城有塔又前爲大淮

水水皆從西來遶陵後東北入海而淮水灣環如

玉帶皆逆水也又前卽盱眙縣治米芾所書第一

山也山不甚高然峰峦橫亘八九與陵正對卽

面前案山又前二百餘里爲大江而陵後則明堂

九曲水遶玄武又後爲影塔湖又後爲汴湖又後
二百里爲黃河又數百里爲泰山大約五百里之
內北戒帶河南戒襟江而十餘里明堂前後復有
淮泗汴河諸水環遶南東北惟龍自西來稍高耳
陵左肩十里爲掛劍臺又左爲洪澤湖又左爲龜
山卽禹鎖支祁處又左爲老子山自老子山北至
清河縣卽淮黃交滙處也 陵右肩六十里爲影
塔湖爲九崗十八窪又右爲柳山爲朱山卽汴梁
虹宿來龍千里結穴真帝王萬年吉壤縣令孫徵

奎云大水時 殿前可一尺其山較泗州城中地
高可丈餘惟 御碑亭前築堤稍斜射而東一帶
人家蔽塞案山似於明堂爲礙耳午飯祠祭署朱
君所因與瓏禧酌數巡而歸謹按圖說稱

熙祖世爲句容通德鄉朱家巷人生宋季元初至
元間因亂挈家渡淮至泗州見其風土醇厚居焉
泗人社會常推爲祭酒居泗凡三十八年一日卧
屋後楊家墩下墩有窩遇二道士過指卧處曰若
葬此必出天子其徒曰何也曰若以枯枝試之必

生葉亟呼天熙祖起曰祖故熟睡道士乃插枯枝
去十日後熙祖侵晨往驗果生葉因拔去生枝
別易枯枝前道士復來心異之見熙祖在旁因
指之曰必此人易去遂語祖曰若有福歿葬此
當出天子語訖忽不見元致和二年丁卯夏熙
祖歿因葬焉甫封土卽自成墳

仁祖年四十六冬十二月携南昌盱眙臨淮三王
及曹國長公主遷於鍾離東鄉至盱眙之木場里
淳皇后見一異人修髯奇貌黃冠朱衣象簡授白

藥一九神光燁燁使吞之遂孕明年天曆元年九
月十八日

太祖高皇帝生 聖造戊辰壬戌丁丑丁未也遼
葬期甫歲餘耳將誕之夜紅光燭天里人起呼朱
氏火及至無有也舍傍故有二郎廟時聞空中語
亟徙去至曉果徙東北百餘步

高皇帝甫生 式龍金龍戲珠 四方已也
淳皇后抱浴池嘆曰家貧乏襁褓具柰何忽紅羅
浮水上因取而衣之今傳爲紅羅障其生處常見

五色王氣世名明光山有紅廟在焉廟在盱眙縣
靈跡鄉距縣百二十里及
高皇帝龍飛定鼎金陵追尊 四代已建 仁祖
淳皇帝陵於鳳陽因命 皇太子至濠泗祭 告
祖考妣於泗州然未識玄宮所在時向城西瀕河
憑弔歲時遣官致祭洪武十七年甲子十月十二
日宗人龍驤衛總旗朱貴從軍于外年老始歸卽
畫圖貼說識認宗派指出居處葬處備陳靈異始
末貴故偕

熙祖北渡者

上卽命 皇太子至泗修建 陵寢號曰 祖陵

命禮部製造

三祖考衮冕冠服座 殿後每歲大小二十六祭

設祭田六百四十九頃僉選人戶三百一十四戶

因授貴奉祀四品服色子孫世襲管理署事當貴

面奏 陵圖時 恩賜田宅鈔錠金帶衣服等物

寵賚有加令置祠署於貴先人所居之稍北其東

南卽

熙祖舊屋基 特賜奉祀官世爲葬地及貴子紱
襲前官 高皇帝召入謹身殿賜膳 卓復賜御前子鷩肉
諭以莫嫌官小與國同濟而楊家墩者宋保義大
夫楊浚大理寺評事楊昉墓也 命改遷於陵西
之黃崗里復 諭戶部免守陵戶役及一應雜色
差糧嘗曰濠泗實朕鄉里 陵寢在焉人民理宜
優恤 諭署民曰隣近荒田儘力開耕永不起科
不屬有司衙門 諭署官曰你衙門裏無刑名造

作也不刷卷嗣是

文皇帝駕過泗州詣陵祭告賜金飾鞍馬鈔錠田
地四十四所並服役百戶內侍等官又命朱貴子
紱諭泗州降有功 駕渡淮仍以令牌召紱至營
賜坐溫語移時賜父老牛酒慰勞焉

列聖承統皆遣重臣祭告景泰時以不雨弘治時
以大風傷陵樹嘉靖時以陵前山石墜以基運山
從祀方澤以 皇嗣未生以脩陵工完皆遣重臣
祭告萬曆二年七月十四夜大風雨損壞殿宇

門墻及湖水衝激東南角岸人命南工部郎郭子章脩理并砌石堤二十年復命南禮侍魯朝節南工部郎沈演周詩再築護堤二道然陵窩稍低前後土頗高似不須堤且諸水朝宗一望瀾澗亦非堤所能障也况舍其右而偏左又有鋒刀尖割之形乎今秋七月二日大水泗城幾沒廬舍皆壞民悉走盱眙山阿至初冬水始退而陵殿前亦幾一尺賴按臣設法防護得無患則堤不足恃明矣朱自讓卽貴十世孫舊爲粵幕以鴻臚序班改今

官其人亦醇謹崇禎辛未臘二日侍講蔣德璟謹記

游官市小記

京師有三市廟市者都城隍廟左右街也以朔望
 及廿五日燈市者上元燈節也以正月十日至十
 八日在東華門外官市者 皇城之內 紫禁城
 之外以每月初四十四廿四日諸士紳多行觀崇
 禎元年臘月二十四日

上萬壽聖節朝賀畢從 會極門即左順門過 文華

殿出東華門循玉河而北計護 皇城紅鋪內三

十六外七十二云至東上門而北即官市也其繁

麗不如廟市然諸貨亦畢集直北行復轉西爲北
上東門過北上門卽後宰門也曰玄武門後爲萬
歲山山凡五如列屏而中稍高出北上西門有兩
坊甚壯麗一曰先天明境一曰太極仙林二亭金
碧尤輝煌一曰炁真閣一曰朔靈軒而中卽始青
道境

肅皇帝建也循始青而北曰福靜門又北爲冰窖
轉西爲陟山門則鑿冰納窖甚多小憩槐樹下觀
之登二亭望西海皆冰遂至遼后洗粧樓僅空山
耳度橋卽坐小橈行冰上以一人曳之行甚駛穿
橋有二坊一曰堆雲一曰積翠遶山而北登岸觀
龍舟甚敞壯舟濶三丈六尺上有樓樓有龍牀龍
椅及后妃六椅其下牕楯尤鮮麗旁小舟甚多俱
藏于船屋循海北而西爲雷霆洪應之殿又東爲
內教場又東爲五龍亭中曰龍津東曰澄祥西曰
湧瑞又東曰滋香又西曰浮翠惟中亭獨出數丈
餘亭如手如驂如鴈而內殿宇尤聳拔其門曰福
海壽岳又西南爲香津亭入仙芳門昭馨門又北

為虎園過牡丹園可數千本皆稻草束之以避凍也過芙蓉亭承華門又南為飛靄亭金鰲玉螭大橋過橋尚多勝景未能及也折而西為永亨門遂出西安裏門為十庫為西華門而歸同遊者兄中黃及同館王宮講昆華也

宮市自東上門至北上門止餘皆西苑勝處

天寧寺小記

天寧寺在章一門外甲戌浴佛日招傳幼心林可任中陞弟齋寺禮佛寺塔隋物也能放毫光其影倒入法堂甚奇行徧僧廬僅兩牡丹始花耳予庚戌與弗棄兄宿其中見牡丹甚艷云例獻東宮尋其花無有也大接引佛高丈六甚靈顯庚戌祈子夢有携兩小兒穿百補綵衣來謂予曰汝子也壬戌祈科名夢王母賜予荔支一大盤皆綠羅袍而以四紅者壓其上是科選庶常為館元與三

鼎甲而四也可任深于禪理望之知是再來人其
令蒲圻環邑樹皆降甘露因對奕小酌折木芍藥
各一枝爲供再移尊塔下低迴久之各拈王字韻
作小詩

三殿鼎新賦

丁卯七月
閣試序二

三殿者 皇中建三極殿也初爲奉天華蓋謹身

肅皇帝仰則天垣遠紬禹範爰錫嘉名我 皇

御籙中興實鼎新焉在易鼎之象曰君子以正位
凝命蓋與書維皇建極之指合璋哉虔誠北辰之
鴻緯南向之盛觀也七年中秋落以斯干之雅敬
拜手稽首而獻賦曰源維幽燕闢基黃帝四千餘
年 明迺繼之昔剪蚩尤我驅蒙古天昧再開王
氣雙吐當時所爲治城闕繕宮室於奉天出治之

地尤三致意焉蓋已高蟠龍虎上憲紫闕籠二儀
以爲官枕萬歲而不渝矣柏梁之厄盛極而然今
皇帝適追祖武堂構是肩顧諟殿基作而 詔
諸中外曰是 成祖宅中之區而 肅祖以疇錫
福之所延也歸會峙其旁正陽當其前東西文武
左右弘宣冠帶萬國龍冕九天列聖陟降其可後
焉於是命司空契元龜欽天練日營繕經初圭臬
揆景般爾競趨發帑則 神廟封椿之貽醪俸則
千官邪許之呼蜀楠吳磚灣石荆銅山祇川后獻

瑞効功爾乃神木輸厥黑窯治瑤臺諫糾敏匠石
究奇百司雷連萬輦雲飛曾未幾時而 皇極門
殿已煥乎其巍巍矣惟 中與建兩殿踵成如彼
太乙之宮前有天乙後有鈎陳是曰紫微 帝座
三辰倣曩規而增麗浴濛汜而俄新恢當陽之寶
勢快神孫之高門若夫雲粲星栴重楹飛昂蘭栴
藻井螭栒鳳窗金扉玉鋪丹陛瑤璫峯峩博敞蔚
駭煒煌靈竊莫際施翁有光固三殿之所同羗難
得而備方也有兩班文武進而稱曰斯舉也蓋遲

之三十年而成之不日乘蠱用幹在鼎元吉當
寶頂之晨安馳露布而生色敢賦周詩上壽千億
於是尚寶陳案教坊奏韶錦衣設幟光祿授肴黃
麾扇翳杖鼓排蕭仗馬馴象羅擁蟬貂鞭鳴簾捲
玉袞以朝然後七舞入九曲湛稱制賜瀝山呼
者三其或冊拜椒掖封遣桐圭臚天人之賢雋
受重譯之航梯禮成郊廟典舉耕蠶頒春小歲
獻至日南升恒進千秋之鏡熊羆叶百堵之占莫
不晴熏春羽日射天香劔鳥花生穆穆皇皇於是

屏宓如却玉女咨夔臯訪箕呂解網除膏吹律回
黍貌言視聽蔽其思歲月日星釐其序雨暘燠寒
五行帥其官食貨徒師三德修其監若是故庶徵
應五福綏而世爲竹苞松茂之主也昔堯有鳩宮
舜有總期儉德雖章大壯非時秦漢諸殿通光臨
華神仙增城門千戶萬則汰王之譏也若衛歌楚
室簪美靈光則又諸侯之事也安足爲今日頌哉
帝錫斯疇肅祖命之肅祖錫疇來孝追之光
啓中興不亦禱庠天子曰嘻是於疇曙其八抑

樞在極乎夫皇極者卽堯舜允執之中而建之卽平康正直之衢三而一者也吾將坐華殿之上燭以玉燭風以景風使東至寤宮之塔西至松套南至鬼方解辯面內莫不來同雖黃帝阪泉之兵亦可不用而穆然治天下以睦峒

林爲磐年兄筍堤集序

有醇儒之氣有名卿之氣醇儒之氣遠其辭莊名卿之氣傑其辭儻似有兩派然如詩書所載禹臯益稷文王蒸民諸篇莫不內緯心性外綜世務名卿卽醇儒也三代下陽明子蓋庶幾焉余與爲磐先生私淑文成有年而惟爲磐實身見之嘗刪輯傳習錄與薛文清讀書錄吾鄉蔡文莊密箴爲三文合刻反證身心期在實踐而於筍江社中揭日氣之學每拈易諸卦作一貫寧儉諸解聽者亡不

心醉也愚尤愛其序予詩曰易首龍詩二南皆首
鳩龍神而鳩拙不可無龍尤不可無鳩予終身誦
之又如孝經者中庸之祖小學者大學之翼實先
得聖天子表章二書盛指至程子作定性書爲
磐以定情書發之真西山作夜氣箴爲磐以旦氣
箴發之陸子靜在白鹿洞講義利爲磐以小人喻
於害發之皆足佐佑六經鼓吹千古卽使程朱復
起薛蔡同堂亦當引爲英朋畏友矧其他乎然一
入仕而司南計部謝去羶差在職方教練兵將具

有機畧在銓選以進賢退不肖爲已任而超然塵
濁之外出都僅兩篋琴書蕭蕭自異卽今栖錄園
居蒔菜數畦與諸郎孝廉存茹兄弟摘啖其根且
分啖余詫香甚也其神澹其度舒骨堅而識敏幾
於合醇儒名卿爲具體而予直一言蔽之曰善養
浩然之氣夫浩然之氣則自旦氣生也陽明子謂
聖人無夜氣予謂今人亦少有旦氣使旦寧如夜
旦旦寧如旦安在其不浩然也嗟乎當吾世而繼
文成者非爲磐誰屬哉文成文莊皆嘗歷官銓部

而文清遂以外寮直文淵閣然未獲竟其用竟之
是在爲磐余且從山中矯首觀之筍堤者濱大江
有惟石拔地如笋左右千年榕十許株黝翠參天
江山幽美中爲在茲書院卽爲磐廬墓讀書處而
余與布衣黃先生偕諸同志從之遊

報國寺雙松小記

同館文鐵菴官允請假歸予偕倪丈鴻寶鄭丈大
白餞報國寺寺在宣武門外可二里建於成化乙
酉以丁亥竣工蓋 憲宗爲 皇太后祝釐處初
入東廊懋禪悅菴則鴻寶大白先在因讀鴻寶送
鐵菴扇頭詩有杜宇鷓鴣訟不已木人土佛道俄
分之句甚警異少選入寺後總聖門禮佛兩傍名
畫百二十軸皆天堂地獄變相僧云宮內送至寺
者登大毘盧閣可三十六級爲 王母及母兩太

君遙祝畢閣外通廊環行一週俯視西山若在襟袖宮闕城市具在因中旁精舍一枝繁花或云梨或云杏甚艷遂行觀成化劉公定之碑出總聖門右轉入僧房有海棠一巨叢其幹十數大可數圍出過後殿多松樹及核桃再出過正殿則雙松恠甚矣雙松偃蓋皆數百年物東者高可三四丈有三層西則僅高二丈許而枝柯盤筓低亞橫斜其蔭數畝虬角龍髯披拂鱗皴其最脩而壓地者以數十紅架承之因移榻其下梳風幕翠一庭寒色

且語鐵菴曰松字十八公也十八年其爲公平一
咲遂別

石鼓小記

癸酉二月五日丁卯當祭 文廟前一日百官例
當瞻拜予約鴻寶過鳴洲宅同行鳴洲出倉庚圖
戲示且下榻小酌予謂不如携之滿井因以小肩
輿循皇城而北過西海子春雪初消溱漫泓淥塵
土爲淨海子舊名積水潭聚西北諸泉流入都城
而滙于此從皇城後入西海出玉河橋與通州合
遠頃之抵國子監成賢街易吉服並馬入至廟門
下馬監生六人迎入廟階下四拜因往戟門內觀

石鼓左右各五其石高可二尺五寸圖徑二尺許
形如鼓而頂微圓四面榴文世傳爲周宣王獵碣
初在陳倉野中唐鄭餘慶遷置鳳翔縣學孔子廟
而亡其二宋皇祐間向傳師求得之十鼓乃足然
其一頂窪類臼矣大觀中徙開封置辟雍靖康末
金人輦歸燕置大興府文廟元皇慶初移置今所
本朝因之第搨者甚多久之恐遂并無字似可度
之高閣也記壬戌春予初釋褐至廟遇同年文湛
持云此鼓非周宣王物直後周宣帝耳予曰後周
才子無如庾信駢偶之文豈有此風雅且籀文甚
古決非三代以下所辨適門人方博士廣德延西
廂小坐則館丈綱存司業具三席爲午飯綱存以
陪中堂徐公玄滬演禮故令方門人來因酌數巡
而別

艷開千朶競麗大者方六七寸目不暇接圃左右
復翼以廊垂楊高梧涼陰惠風汎人襟袖而右廡
尤美前雕欄後曲水真勝界也圃後爲高臺臺高
可丈餘前列七石皆太湖物登臺則樹色參天濃
翠環擁日向午張帷幕其上花香撲鼻劉君請余
臺名爲名曰太乙臺用卯金事也循臺而下小憩
待湛持久不至因同諸丈入王璫園園不如劉惟
兩海棠古甚不減報國寺二株也其外多白楊蓋
璫瘞處惟麥圃寬濶一二農人荷鋤其中差不俗

耳旋入資福寺列栢成行可數百株寺雖荒廢亦
勝金碧入三門皆禮佛最後爲卧佛丈六足根大
可三尺許有捨履者履小不能蔽一趾也殿門有
董玄宰王非熊二扁董曰眼前佛國王曰智燈長
焰字皆適美而日過中矣歸小飲斗墅亭中劉君
出家樂侑之作芍藥題緘一齣未闕而湛持至矣
遂共飲于右廡演白太傅青衫記畢循行左右圃
與牡丹別而蘋果實亦離離大如梅矣湛持摘分
耳久之遂歸書田云園本鄭戚晚養性物劉以五

百金得之恨不移向城中予謂城外爲佳蓋不獨
園與花之美其一道垂楊使人如在江南山水中
而西山亦自親人爲無城市氣也
牡丹自唐武后後始盛天寶中始重之謂之木芍
藥卽太真所賞太白清平調三也本草牡丹一名
百兩金譜以姚黃爲花王魏紫爲花后芍藥爲相
而后山談叢云廣陵芍藥有紅瓣黃腰者號金帶
圍而無種有時出則城中當有宰相韓魏公守廣
陵一出四枝在坐王岐公王荆公陳秀公皆入相

建溪石小記

建溪一身皆石也浮者爲鼻沉者爲腹痛者爲足
秀者爲睂目翠者爲蓮花狠者劍鏗每逆一灘舟
穿亂石中篙師縉丁急與之角着着應手手微鬆
卽與舟俱碎而兩岸多小翠石兒輩因乘間撿之
凡得百四十八枚如豆如瓜子如鼠矢如蜂如柿
核如蚌如蚌如石榴如瘦木如祖母珠如菡睛如
窟變如螺如端硯眼如丹砂如黃蠟而以龍鱗鱸
爲冠軍紫玉腰次之使米襄陽見之便當入袖而

遇高僧有道者卽捨以爲供亦無不可也

記紫雲雙塔游

淨師從紫雲寺住持清源西洞天以予喜石捨洞石見供佐以乳泉一缶曰吾往來清源紫雲間甚適也紫雲有東塔殿吾師派上人舊址詹司寇題詩林禪榻處雖數楹然以附塔陰涼可暫憩遂約黃公季暎林公爲磐與予茗飲其下而盱江鄧君應瑞者徵君潛谷先生曾孫也遠來訪予僑于寺東偏因邀共坐啖蔬菓甚香潔晚鍾鳴起踏月遶塔禮數巡林公曰偉哉塔也當其願力所至架石

挿雲鬼斧神鞭不可思議吾黨立地作聖肯辨如此願力不愁不到塔尖黃公曰亦全在塔根聞塔下尚有巨石兩層合上爲七無此兩層卽萬仞安頓何處予曰塔尖高塔根實亦更在塔心有塔心方有塔身八面許多玲瓏中間只是一箇黃公曰此心合下便具七層老僧初下手時已具全塔在胸中不是逐層做去如吾夫子志學就合下有從心地也予曰塔有尖心恐無尖百尺竿頭更有進處因舉無所住而生其心扣淨淨曰心無住塔

有住卽心是塔元來無住無生復舉一切有爲法偈淨未荅林公曰有爲無爲總從心造造自梁武帝是有爲法卽有漏因造自老僧是無爲法卽真功德衆爲豁然時有吳烈婦楊氏十日就義林公舉似曰此是真願力予曰渠看得金剛偈透將死生作夢幻泡影觀纔能從容爾爾此卽是真佛丈六金身非佛也佛皆吾儒所有只吾儒說出成仁取義旣足主張名教亦與佛理關通而徒以一切夢幻泡影空之則塔亦屬有爲法雖造自梁武帝

與造自老僧其爲人天小果一也林公爲之啓齒
已復舉退之人其人三語曰退之實孟子後一人
陽明又退之後一人皆真造浮圖手黃公戲曰李
文節有言未聞明先王之道以道之而輒廬其居
亦不必予曰壇越孫應作是語因哄堂一噓旣自
東塔出大殿庭月如晝復繞西塔數巡而歸按志
紫雲寺唐垂拱中州民黃守恭故宅地捨爲寺卽
黃公始祖也東鎮國塔咸亨中文僊禪師以木爲
之凡九級咸通中倉曹徐宗仁以佛舍利鎮塔中

宋天禧中改爲十三級紹興乙亥災淳熙丙午僧
了性重建寶慶丁亥復災僧守淳易以磚凡七級
嘉熙戊戌僧本洪始易以石僅一級而止法權繼
之至第四級天竺講主作第五級及合尖凡十年
始成其上有鐵香鑪銅寶蓋於塔八角以鍍鍊上
鈎之頂作沃金葫蘆焜焜若黃金色每層中爲塔
心環轉空洞層各八龕龕供石菩薩一尊兩壁刻
二大神像翼之外遶廊簷護以石欄圓廣一百七
十二尺高一百九十三尺五十凡大柱四十大小

梁各四十大斗百九十二小斗四百四十枿四十
大拱百有十二小拱八十皆巨石爲之西仁壽塔
建於梁貞明二年戊申先是地踴者數尺俄有神
僧浮海止於寺適閩王審知於大都督府造木塔
塔成沉而湧泉夜夢一僧曰塔沉而湧泉泉者泉
也可移鎮泉州王怒斬僧白乳高湧數尺王覺以
物色求之泉人云有風和尚去矣王乃以木植浮
海至泉建塔明年成號無量壽塔宋政和甲午十
月十日有青黃光起塔中高侵雲須臾五色質明

乃滅因賜名仁壽紹興乙亥災淳熙間僧了性再
造復災僧守淳易以磚紹定元年僧自證始易以
石頂藏金銀諸寶規制如東塔而圍廣殺五尺高
減一丈五尺五寸壯麗聳拔則相伯仲也蓋嘉熙
元年始竣工實先東塔十年云二塔及蔡忠惠萬
安橋皆爲海內冠丁丑仲夏十九日德璟記

記圓通菴舊遊

家君口授

許家巷有山紫而橫曰橫山一名桃梨山山麓有古圓通菴供養吳真人諸像萬曆己卯余偕王孝廉乾開讀書庵中湫狃甚獨其春小葫蘆頗靈異歛則必雨巷人占焉予三日一對壘論文竟卽飲母氏吳太恭人以其日從福全餉酒不厭更赴酒家貰酒徑醉嘗一夕雨臥堦前巷人遙見火光驚護之亡有則赤毫光也族猴三過庵自縛梁上更縛床竿魔嬈之予與同寢猴三內魔亦內外亦外

驚不止予無覩也試與乾開祝神前神而魔柰何
猴三指其鼻及足視神鼻鞞果壞因舉神火之以
煖酒且曰二生異日貴必新神而是時晉江令梁
公自強丈田過乾開坐定問同窓爲誰乾開以余
對因呼出之梁公曰庵中三進士蔣當後勁
時余儒士也將歸轟飲於神腹下忽得古銀償酒
進恰如其數明年庚辰乾開成進士乙酉余舉順
天壬辰亦成進士而乾開子寅揆偕余兒璟巳酉
復同舉旋皆成進士今去讀書之歲四十有四年
矣古君子能自顯於世雖其微時游釣之處不忍
忘况余家福全濱海入郡必經橫山居往來八十
里之中田園雖薄賴以共其屝屨而是容膝數易
地得吾二人爲之主亦有非偶然者旣葺而新之
因記以示後人乾開名三陽官南京工部主事梁
公名必強瓊山人甲戌進士在余瓊管部內前進
士廣東叅議蔣光彥記男德璟謹書

作室以祀曰祠。本朝因之著在會典千戶雖武
得從公侯之後世官世祿於古則子男也。二宜廟
禮祖有功宗有德吾祖從

高皇帝舉義旗渡江戡定天下世有武功鎮佑茲
土及先君觀察用文顯有德於交黎甚大生祠歿
碑俎豆幾徧三宜廟程子言宗子無法則朝廷無
世臣然無世臣則亦無宗子雖宗法亦不靈今宗
子世其官得行宗法以尊朝廷四宜廟五世而建
十世而修建者生申修者亦生申一也建于天順

展祖小記

璟甫十歲別福全從先府君之江山爲萬曆癸巳蓋七年而爲巳亥自南京歸以髻入泮又十年爲巳酉叨薦于鄉再至福全謁祖海人餉大魚可數千斤放之戊午春從府君樹綸恩坊適關帝廟鼎新燈拜甚盛甲子乙丑弟瑗復連第乙丑璟奉祖母吳太君命鼎新祖廟因奉主入祀凡間數年裁一至至不數日然夢寐輒在赤山蓮嶼前也已巳使淮邸歸省吳祖母方以節蒙恩

特旌而日府君亦以瓌瑗官再晉階授以誥庚午
曾孫鳴雷復登賢書禮當告廟於是辛未中秋既
望率弟瓏及姪雷行是日雨間作四十里過橫山
飯許家巷圓通庵中從兄斗之子堂衡以酒迓爲
飲數巡庵前小廊卽府君讀書處也墻瓦不治
因捐貲命僧脩之廿里經龍虺二湖龍湖大於虺
夾道左右相距數百丈而雨漲瀰漫甚遠過此卽
沙崗矣沙崗古腴地也以樹髡蕩爲磧風舞沙飛
行不辨路余甲子嘗立石碑五爲行旅指南十里

山頭掌所篆宗子德榜偕群從迓遂以燎行月漸
皎諸父老相勞苦爲慰十里福全城西大士菴族
人皆在遂入城自菴至家燈火甚盛月明如晝十
七日同宗子謁祭家廟卽出北門謁始祖武節
將軍諱旺墳在乳山可十里前臨海以深滬聖殿
爲案三台山環之後高圍地直長數百丈形家名
曰倒地木其盡處亦有三台左則龍虺二湖赴海
之腋永寧姑嫂塢峙焉遠望雙陽如二筆右則大
乳小乳山連亘擁護相傳茲穴爲金刀剪芙蓉云

墳左數百武有大王菴小酌遂行二里許爲坑邊
謁三代祖武節將軍諱勇墳亦佳穴也舊苦風
沙萬曆辛亥壬子間環墓聚蔕草爲蔽近墳諸地
遂得藝塲耐風沙歸會族燕于家廟旋飲兪斗
酒十八日禮關帝廟出北門謁四代小宗祖上
岩墳五代祖鈍菴下岩墳二墳相距不數丈皆
眠弓案後枕大海上岩面對雙陽下岩則雙陽在
左皆有情行里許爲坑尾謁二代祖武節將軍
諱正墳相傳祖當永樂時以事逮赴京卒妣

鼎建福蔣世室記

德璟既重修福全家廟奉祀 始祖武節將軍以

高祖果軒公 曾祖赤山公 祖贈中憲大夫浙

江温州府知府敬齋府君 父廣東叅議江西副

使兩晉階中議大夫九觀府君入祔矣顧自吾父

舉萬曆壬辰奉大母吳太恭人居郡念欲建小宗

祠而歷官中外未遑舉迨吳大母年垂百吾母陳

太恭人亦八十矣猶時命璟兄弟竟父志璟謝不

敢忘崇禎乙亥冬始得地於肅清門內節孝里距

銀杏宅僅數武遂與弟給事中瑗捐俸鼎建外爲
祠門作小耳房二內爲 天恩帝賚堂奉 中

憲 中議二府君暨 吳 陳二太君後爲基瑞

室奉 赤山公暨 留會祖妣而設 始祖行主

遇冬至禘祭拜焉置神厨二兼藏鄉會殿諸試卷

錄遺書衣物祭器上爲 寶綸閣攬清紫雙陽諸

勝奉歷朝誥勅制書尊

君賜也閣後爲龍眼古樹繚以周垣左右通巷皆

有井發覆得之右尤深冽爲銘其幹曰福全蔣片

其之外卽環敬日新宅亦有龍眼樹森蔚相望如

華蓋焉其後卽八卦溝也里人謂樹與井皆唐宋

遺卽舊屋亦莫詳所繇久迺自圯以丙子長至興

工初動土時有三鵲五鈴鴿飛鳴盤繞之瑞萬日

詫竒越明年二月落成八月葬我吳太君始卜吉

九月壬午偕兄瓚瑄翁瓏瑗等奉主致祭禮也按

禮別子爲祖繼別爲宗解曰別子謂公子若始來

此國或身自起爲卿大夫者赤山公自福全卜郡

宅中議居之且起家名進士以有中憲之褒贈則

中憲爲始爵之祖又曰祖有功宗有德始祖開國
勛尚矣雖世官然自赤山公始大凡晉南惠安永
諸邑田廬皆公手營毅才俠識實范少伯以上中
議每曰子孫卽百科第安敢望吾祖布衣也其功
在垂統中憲以英雋蚤世開詩書府而吳太君矢
志栢舟身兼劄守親見子孫曾通籍于朝封旌金
錫海內稱母師焉其功在立孤中議事節母孝令
江山築九清鹿溪二橋司南庾權杭關守温州建
牙南瑞雷廉瓊綏交定黎寬仁廉勁所至見思凡

爲生祠六名宦三鄉賢一而全活欽交四崗崖黎
多港等二百餘崗陰善甚博其功在不殺降且非
獨功也德尤盛焉陳太君佐以柔淑上媚嚴姑下
字鴈鳩以儷德顯蓋三世而具千萬年之澤於泐
均百世不遷特廟宜矣署世室何傳曰周公稱太
廟魯公稱世室言爲世世室不毀也吾蔣胤自周
公且今之藩臬大夫古侯伯連帥職也稱世室不
亦歆乎禮旣成謹書以示子孫而交勗曰懋哉世
德作求以介景福卽與清紫諸名山同久可矣祠


坐辛向乙兼酉卯費可六白金璟瑗各庀其半而
董役者瓚兒鳳焜篤孝開敏并書勸焉諸圭田儀
物具如左

華陽三徑小記

三徑自吾家辛求專稱華陽者以在玉華宮之陽
也初 觀察府君擬移宮當巷 陳太君亦欲稍
廣宮制皆未果崇禎丁丑臘芳隣蔡君以其館與
予小齋近而與予宅相向固欲歸予然其地僅容
膝及堂軒數楹而已而門在西偏頗爲形家所忌
予既以善價承之因循覽東偏隙地數笏有橘榴
四甚古久廢爲鷄豚圈蕪不治予友林公讓菴及
弟中陞謂宜移門于東且樹竹籬如華表狀蔽旁

春遂剗其朽壤可八萬斤以其餘築臺旁立怪石而植黃精地黃杞菊管松椿桂梅竹紫薇宜男長春之屬復築小亭其前曰敬日其徑曰紫桂便門通別業曰小東華於是三徑之勝耳目若驟新云已復以移宮卜於神曰吉遂移數尺昇更棟宇比舊稍深廣適與巷對靈爽煥然并葺旁諸小屋計費可五百緡浮矣按龜山白玉上經稱十六洞天第八曰華陽而真誥以爲洞虛四郭有陰暉夜光日精之根照此空內明並日月東通林屋北通岱

宗西通峨眉南通羅浮皆大道間有小雜路阡陌抄會非一處吾三徑雖在陋巷安知不隱巖其間耶真誥又記漢劉文饒用心仁愛眎民如子晉東平守李忠祖母奚子多行陰德恩及烏雀今皆在華陽洞中吾祖母吳母陳兩太君似奚子先府君似文饒又安知其不偕群真往來金堂石室間也予雖愚然少好道故稱華陽而并識先德以見予志之所存工始於丁丑臘廿四日竣於戊寅中和節而予蒙召掌左春坊且趨朝因爲之記



廟尚巋然如魯靈光所藏容老玉佩亦與欹器並
存祖武孫謀遠迺益章可謂世德予上下千古喬
木之家如傳氏者殆不可多見也元光疑元光恐
是漢武帝紀年或擬周廟爲之然扣之純作木聲
其色澤特黝古要當爲二千年物傳氏子孫尚世
守之哉世守之哉崇禎丙子八月書

家語夫子論持滿曰聰明睿智守之以愚功被
天下守之以讓勇力振世守之以怯富有四海
守之以謙此損之又損之之道說苑引之則曰

高而能下滿而能虛富而能儉貴而能卑智而
能愚勇而能怯辯而能訥博而能淺明而能闇
是謂損而不極能行此道惟至德者及之其指
尤備予友林君爲磐用說苑欵器語與金人銘
並書座右可謂善學聖人者因各酌酒器中而
日捧欵器之物琤於禹鼎湯盃酌欵器之酒嚴
於賓筵妹誥遂各圖其形歸而置之以時省觀
焉德璟載識

栖綠書院記

銓部林子爲磐題其書院曰栖綠或曰是園也舊
名莎綠存名厚也或曰倣裴晉公綠野謙言棲也
友人蔣子德璟咏詩而得之曰是其在淇澳乎淇
澳咏綠者三爾雅綠作菘毛傳曰王芻也箋曰一
名鹿蓐陸機以爲莖葉似竹而正義非之曰綠與
竹蓋二草云言綠竹所以美盛繇得淇水之潤衛
武公所以德盛繇得康叔之烈其指甚遠今林大
父潛江大夫方以望百之年穀子詒孫爲海內師

表而銓部親奉庭教以與諸君子切磋琢磨成其
寶器眎衛武公隔代而述康叔能若公祖孫同一
堂乎否也雖然其爲綠竹之得潤則一也門人李
君登卿鄭君熙揆等進而稱曰夫道猶水也於家
爲星宿於世爲河海有星宿必有河海是固然矣
而爲河海者則每合千派萬支之水以成其大今
林夫子世之河海也其神淵其德全人貌而天其
俯而淑吾黨恕採而敬敷舉能而導愚若千派萬
支之赴于滉漾之波而不知其際也夫子嘗以旦

氣之學覺世蓋有筍江書院之會而兵使者峽江
曾公題之曰任仁仁在造物以雨露生物仁在聖
人以平日生人人而無平日則是天地無雨露而
物彙不復有萌芽也將舉世而爲牛羊之世乎哉
是故任仁之仁萬紫千紅總一春也栖綠之綠水
碧山青無非教也識其爲無非教而後知聖門求
仁之學效天法地之學也陽明之良知知此虛齋
之密箴密此曾公之任仁亦任此而已矣林子蹙
然曰仁則吾未能任則何敢讓焉方與蔣子勉之

抑衛武公之詩曰民之靡盬誰夙知而莫成武公
之成至于如金錫如圭璧而其學得力于知曰秩
不知郵不知臧否不知不知則謂之興迷知則謂
之有覺吾黨一以有覺交相勉焉可也院在城西
偏居室之北左挹金粟右擁清源園地清曠老樹
嫩蔬四時蔥蒨爲城市中洞福而林子復題其徑
曰菜根香蓋取咬得菜根百事可做之義其風擦
如此於是蔣子與林子約子且出其以旦氣覺一
世而歸歸而如裴公逍遙于綠野之上使蔣子得
從而學圃何如林子曰敬諾

記舟峰雷薦亭事

舟峰南有林公墓卽齧使潛江公父也右爲林洞
是多怪石森峭萬狀齧使率其孫吏部爲磐君築
亭於此以攬山川之勝而寄其終身之思亭甫成
而雷從石起二匠人方椿灰驚墜山下無幾微損
卽亭上一瓦一木亦不動衆咸異之時崇禎辛未
三月七日也爲磐君謂舟峰千百年僂鬱之氣再
經開闢條着靈異而璟以爲齧使祖孫孝思所格
易雷出地豫取殷薦祖考之義故名其亭曰雷薦

而記之

封御史馨齋黃公棚菴祠記

距同安南六十里爲深青驛驛東偏有祠則里人以奉封侍御馨齋黃公而名之曰棚菴蓋取武當山寄梅於棚棚化爲梅之義以封翁在時數從鼎羨來僑居郵亭而菟裘復在蓮山之陽相望不數武亦如梅之寄棚然則又以封翁慈祥豈弟與深青田更禍父相疑洽如家人父子迨以子芝仲貴兩受中舍御史之封宜岸然有以自異而翁之與田更禍父遊自若也海氛內擾相戒勿犯黃封翁

廬而翁亦避之蓋鼎羨十二而居深青十之八九
翁忘其僑深青人忘翁之僑畏壘幾於大穰亦如
棚之化爲梅然然而稱棚不稱梅何則猶封翁善
與人同之指也蔣子曰觀於鄉知王道易易詎不
信哉庚桑楚尚矣三代下若陳穎川平心率物曉
譬曲直退無怨者王太原敦行著信化盜不復拾
遺田子春入徐無山班行條教遂成都邑管幼安
廬遼東會井爭汲爲多買汲器置井傍各相悔責
元紫芝居陸渾不爲墻垣扃鑰觴詠陶然不言而

信陽亢宗隱中條有奴都兒化其德亦方介自守
諸君子皆當囂濁之世陶以太古默返真淳是故
所飲之水卽爲醴泉所蔭之木卽爲交讓而所游
之村巷卽爲華胥以今封翁思之卽一變至道何
棘也余向銘封翁墓謂得賢士大夫易得賢封君
難以其介公卿庶人之間往往於車上僂以爲其
子累若封翁者真可置之穎川太原諸君子之列
而惜哉不可復得矣芝仲天性孝友遇人無疾言
遽色卽之穆然而外和內朗淵乎似道余心嚴事

之其所至尤有風愛蓋得之翁教爲深語曰不知其父跡其子子如芝仲雖謂翁不沒可也深青當泉漳孔道五方雜處號爲難馴予旣以深青人知愛敬翁信王道之易而更以有芝仲爲翁喜也武當之棚梅其後必大予且觀之芝仲以崇禎癸酉臘塋翁蓮山明年春始築祠題曰深林一枝前堂後樓各三楹左環小屋右爲于野亭廣若干尺深稱是而鼎羨在文圃山下相距十里許鼎羨者翁世居也芝仲旣貴猶居之而時來往公祠下以寄

永思

讀廬墓記

寧州王先生信者關中孝子也侍父疾衣不解帶
迎醫禱神重趼劬瘁父沒廬墓寢由三年夜必燃
燭焚香環墓行百七十步以斗頂土作塚未祥不
啖菜果不飲茶未大祥不用醬醢未禫不肉不酒
不見室人既闕猶遵孟獻子比御不入之禮不復
寢既禫遷主始出門又越數旬吉祭後始入室旋
立家廟定祭儀墳禁祠禁示子孫迨喪母母憐其
老彌留時泣戒勿廬墓然其守禮益嚴自院道郡

縣皆扁而旌之貢入京師德璟適閱廷試卷異其才置高第於是閣部臺省知君者多稱述焉辛未臘璟使還過靈璧而君爲其邑學師則長公祥旣魁于鄉次子鳳亦以恩選知名當世蓋天所以勸孝者章矣於是讀廬墓記而書之特曰周地官司徒以六行教鄉及師保教國子皆首孝禮內則后王命冢宰降德子事父母先焉以是爲教之本也周衰教廢入兩漢始還古然其見於史者獨萬石君奮江諫議革薛侍中包孝謹最著而其後以廬

墓顯者南北朝有劉瑜法宗庾黔婁司馬暠王延唐有元德秀褚無量宋有徐積孔叟毛安興等安典材九歲耳廬墓如成人尤奇異計數千年來王侯將相何翅千百而篤禮廬墓不滿五十人豈不難哉蓋璟幼讀孝經而疑之以爲子之孝當倍於親之慈而慈無經孝獨有經何也其亦興於中古聖人有衰世之意焉而自薦辟行此意猶有存者迨科舉之制興於是場屋士子以名利相講究幾不知古禮爲何物父子尚爾何況君臣於戲此世

道之深憂也夫事有本末忠孝本也名利末也得其本則末隨趨其末則本末俱喪故行孝弟脩仁義雖簞瓢已足以自樂而造物未嘗不豐為之報而驚名矜利之人使其幸遇亦不足談一有沮困躁悶無所容與鑊湯鑪炭無異斯亦賢愚之最曉者矣而世顧以彼易此何也家大夫少孤事吾祖母吳篤孝即既貴常長跽奉卮酒為歡子孫則之不敢實隊故余見王先生輒下拜以為三代上人而遂特書之以勸世之為人子

敬日草卷八目錄

贊 題卷 跋 書事 告文

金陵遙祝贊

封給諫華谷林太公像贊

黃季弢像贊

題三鳳真蹟

四友二老圖詩跋

○題黃慎菴宮諭書後

○題太史雷老師書後

題桂封翁卷

○題薛水部永思卷

題楊文恪書 祖母貞壽詩後

○書鏡虹閣圖後

題桃源索隱冊 六則

題魯千巖墨竹

書閣試東事戰守款議後

書閣試理財議後

書閣試武經七書序後

書閣試三殿鼎新賦後

書丁卯七月散館進呈卷後

○題温州林生孟春卷

書江山舊吏毛應麟卷

書朱貞孝事

○告鄉賢文

告 祖母吳太君文

○告先室張氏文

金陵遙祝圖贊

子壽其親孫壽其祖則有貌其祖與親於山川日月松柏之間以致其祝者若遠而無從貌而自爲之貌以祝古未有也從金陵望溫陵可百繇旬於尺幅之中而左爲清源金粟右爲燕磯雨花宮闕嵯峨之狀使三千里縮爲几席而以其身攜其穉子踰雲而稱一卮焉烟樹若相語香嬰之氣若相聞宮錦徘徊蠕蠕欲動古未有也微哉職方林子之思也林子旣以畫圖上之王父轉運大夫暨封

翁主事公以代鞠脮而其友德璟爲之贊
身官吳眼在閩高雲下八眉春魚袋翟冠玳瑁筵欲往
從之氣僊僊高堂曰嘻汝天衢潔廉任職百不須
呼來劔孫飴與舖三世金緋四世娛遊子再拜膝
下雲南飛一曲半空聞

封給諫華谷林太公像贊

謂公隱耶緋衣犀比爲貴人容謂公仕耶雲骨霞
姿爲逸民蹤少孤事母致愉傲舞萊絲穎封晚課
夕郎勗廉誠寬爲世鸞龍自楚署歸吉祥止止拜
命益恭諫坡超入公曰無激元氣是邕長者之言
壽者之相六朝喬松石竺蟠桃列真游戲一筇相
從高山仰止詔爾後昆來燕來宗

黃季弢像贊

黃季弢像贊

以筍江南臺爲主以鷺湖佳廬天台雁宕武夷普陀爲客以閩道南一派爲友而以新安姚江爲師且爲之矚人而不見迹其體輕其神奕其年在申伏轅固諸儒間進之爲卜商爲衛武之二公皆望百而公歆然不自居不杖不輿曰吾聊與野人爭席蓋嘗聽公之琴而公亦錫予以白石曰以當二十八宿何如而予益之爲三百六十請以當易也順風拜公示我物格

飛鳥... 則風我公示其神...

十八... 則風我公示其神...

則風我公示其神...

則風我公示其神...

則風我公示其神...

則風我公示其神...

則風我公示其神...

則風我公示其神...

題三鳳真蹟

二鳳者余祖姑丈王叅知慎中及梁吏部懷仁蔡尚書克廉也嘉靖丙戌己丑間三公以次弱冠登制科歸娶海內艷而稱之叅知既壻余家與曾大父赤山公最驩書問無虛日故余家所藏墨為多而尚書有子奉常心可先生及孫擊甫世其學故其書藏家亦多惟吏部年位與後皆不如余所見僅此六詩耳書亦秀絕與尚書競爽而叅知筆力峻峭居然南宮父子詩與文尤高千古即此亦其

碎金矣自前丙戌距今業百餘年而數札猶完好
 疑為神物所愛護又得擊甬東而什襲之以存其
 祖而并及祖之友可謂慈孝之用心且使後人得
 以覽觀前輩所為一時三鳳者其流風餘韻掩映
 如此固不獨蔡氏帳中之寶而已

四友二老圖詩跋

神宗皇帝之壬辰舉士三百而先君子觀察與焉
 閱四朝為今上庚午而在朝者獨太子

太傅太宰長垣王公太子太保大司徒淄川畢公
 太子少保大宗伯湘潭李公少司空烏程沈公四
 人而已沈公倣唐香山宋耆英遺意命工為四友
 圖各自為詩及贊未幾李公旋卒明年夏沈公以
 南大司寇遷則王公亦謝事歸而北僅畢公一人
 其秋今大司空鄒平張公起領南臺於是南遂得

其二沈公因復爲三老圖與四友圖而六而實則
五人而已又明年德璟使還入都以年家子侍畢
公因得捧觀二圖而竊歎公神祖作人之盛與
今皇帝求舊之殷也昔神祖御曆久駿德
純禧百王寡儷計數十年來鉅卿碩輔皆萬曆十
六科之人而壬辰爲日方中故其人多淳茂瑋傑
久而彌顯而我 皇上起自潛邸剪鋤璫逆求
治若渴所拔名皆 神祖之遺至壬辰一榜則

周官六卿遂居其五望實並蔚爲世麟龜而在外

若督川貴五省之師少傅山陰朱公在家閣臣若
余邑少傅史公蒲州少師韓公以及諸名公卿尚
比比也倚與盛哉同年之名蓋自唐始間惟貞元
韓退之榜艷稱龍虎及宋太平興國張乖崖榜自
侈得人然至於敷歷之久四十餘年而猶紆紫橫
玉相與翱翔于廟廊之上爲 聖主股肱腹心

之佐則三百得五已覺爲多而香山之九老皆退
居不仕耆英之十三老獨文潞公留守西都仕耳
且亦非同籍也貞元及興國二榜同籍矣又未必

老而同朝委蛇詩酒有衣冠圖繪之華繇此觀之則茲舉豈獨

熙朝之盛事而實千古同籍之

曠談也古之大臣有勳勞于國則其君爲之畫麒麟圖雲臺凌烟進而五三之代至爲之審其象于巖野貌其名于詩書而大約以求舊爲主伊呂畢散皆百餘歲猶都卿相可謂上瑞迨其後也而第使之優游蕭散以香山雒下老其亦異于古之君臣矣而香山猶云除却三山五天竺人間此會且應無潞公復以元豐之燕爲遠勝會昌視今五公

之仕而爲此會此圖者何如也璟辱譜末猶子旣快諸世父之舉而更以用舊之美爲我

皇頌

蓋庶幾三代之遺焉謹書以識其盛崇禎壬申重九春坊中允兼編修知制誥年家子晉江蔣德璟謹跋

書楊文恪題祖母貞壽詩後

文恪與先觀察少應童子試名相甲乙因定交而
文恪先貴然衿契甚歡也比同官金陵爲璟祖母
吳太君貞壽詩風格高華字尤遒美兼有唐人王
韋虞諸之長璟家世寶之元補輯公鼎甲對策及
諸手澤刻石而此詩在焉旣以見元補孝思又爲
先貞壽表章比於國風栢舟之義良不朽也詩凡
四律其四曰當年藝苑結交驩若母真同吾母看
蓋實錄而石刻僅存其三因附識之

題桂封翁卷

欲知前世因受者是欲知後世因作者是因之指
 與儒因才老司契原合要使因之權常在我不在
 天常在作者之日而不在受者之日言作即不必
 言受言積亦不須言報言受言報諸賢聖為眾人
 說法非得已也念奇桂先生早邃鷺湖晚悟鷺嶺
 遺言七十二字幾證菩提矣潘參公為余言茶字
 之夢猶若追子舍永訣而以期未盡展為恨而不
 知先生已含笑于真宮淨土之間猶之雲芽乳花

之一啜也董仲舒曰孝子於火如土事火土者天之股肱也其德茂美不可名以一時之功然而皆并美於火孝之至也余于潘參公亦云

題桃源索隱冊六則

今人未必不勝古也善卷辭舜天下逃之枉山至今武陵人知有枉山與善卷漁郎逢桃花林林盡水源便得一山至今不知山何名漁郎何姓也漁郎賢於善卷矣或曰漁郎黃道真也然乎山再尋迷不得路則以桃源名山又非也此索隱之所為作也倘必以緣蘿為門花源為庭穿石為堂與沙蘿新湘為亭榭而水心為後戶則安知高靈金鶴焦林大蠟諸洞之非漁郎之所入而為此斤斤也

袁石公桃花源注自是一幅朝川迺褐公又重開生
面矣

山水之隱顯皆時爲之而仙與人各爭其半仙欲
使之隱人不能顯人欲使之顯仙亦不能隱也以
謝永嘉伐山搜勝力無所不窮顧咫尺不知有雁
蕩而張邈過扇笠小憇乃能知武當之必顯何哉
桃源前得漁郎後得褐公自是山候當顯第未知
葉少蘊所稱山無雜合惟二鳥來往尚似晉宋時
否

真誥言諸洞天各有日月忽然起滅不繇穴竇虛
空之內石階曲出高真上下亦不繇五門然自余
所至武夷羅浮匡廬麻姑支硎句曲嶧山諸勝曩
稱翳密近多展露將貞白所謂時移事異不復可
准耶內人喁喁耳有異人者以雲海爲曾以芝朮
爲糧以排闥闔挾鴻濛爲氣而其足目與手又皆
足以赴之卽神仙亦引讓焉於是天地之奇始畢
吐

武陵有桃源余溫陵亦有清源兩源差可耦然褐

公能於杳花源深處得許奇異其言語妙天下而
余不能於清源西洞天外更有開闢余愧矣

二酉爲穆王藏書處亦曰秦人藏書處意秦焚書
時避秦者挾書偕隱且爲藏之名山勝孔壁汲冢
遠矣禍公曰秦焚書楚掠焚人知罪秦不知功楚
此誠篤論而相傳昔有樵入石室取書出皆應手
灰滅然則孔壁汲冢又何以能獨存也禹登宛委
得金簡玉字知水泉之脉仲尼登泰山見七十二
家字各不同又能識龍威丈人洞庭禹書兩聖人

有書癖亦有書緣惜樵夫非其人耳王烈得抱犢
山石室兩卷書僅諳數十字以示稽叔夜盡知之
及將叔夜往顧失其處叔夜無書緣樵夫無書癖
恨不使褐公與余見之

趙季仁三願一願識盡世間好人二願讀盡世間
好書三願看盡世間好山水鶴林曰盡則安能第
身到處莫放過耳大約觀山水亦如讀書隨其識
趣之高下而吳立夫則謂胷中無三萬卷書眼中
無奇山水未必能文則夫世之讀盡書看盡山水

而不能文者比比也惟有褐公之文始有沔源之山水始可讀秦人云西之書八公山樵蔣德璟題

...

...

...

書閣試東事戰守欵議後

此璟謁除初試也試在東閣與前輩姚公崑斗同年李公雍來而予居第三然二公詩文皆不見賞獨予卷謬為閣中所推乃知骰子選都不論文也雍來謂子鄉有政府何以都不相見予謂璟選館已叨第一榮進素定古人以師德及門為恥何以見為且第一亦何足重此後屢試皆見抑獨散館進呈不得已以予冠軍予亦都不復見

書閣試理財議後

是日予適病強入東閣試又手便成都不能工然閣中以前見抑爲歎而館中諸君子亦詫曰蔣八公乃第三耶序出乃第一予方以文字不工爲媿而忽居上此又不可曉也

書閣試武經七書序後

予於試不起草隨手寫就同年李君雍來同榻常戲謂予胸有成竹乃爾政府李公續溪每愛予文私語雍來曰今館中須是蔣君領袖聞其下筆輒掃將去何減子瞻予聞而媿其意然是日序出復

第二其首則雍來也同鄉政府謂予以避嫌故抑予予謂歐陽公拔子瞻亦只是第二耳且一二何足道而閣中君子輒以驕穉士大夫何哉

書閣試三殿鼎新賦後

璟少喜作賦旣久爲之甚厭駢襍是日入試則同事者多以三殿賦題預擬予謂小賦何必爾且奸璫爲政方欲以殿工序賚有識者定不以此題試吾儕旣入則果殿工也一揮而就然閣中亦多喜予賦而復抑之雍來謂予曰賦中屏宓妃却玉女

咨夔臯訪伊呂解網除青吹律回黍諸語當事恐
奸璫見之不悅耳然魏璫不識丁亦未必爾也是
時妖媼客氏離間中宮多市美姝蠱惑

先帝而魏璫緹騎四出屠戮名賢故予賦中及之因
以爲諷

書丁卯七月散館第一進呈卷後

是日內閣以予卷第一進呈而內夾格孔帑一帙
予既忘取閣中諸老讀卷亦忘之詰朝魏忠賢矯
傳

旨首卷夾一白帑大不敬削奪報至予適對同館
諸丈小酌諸丈曰適報者何也予盡一觴曰奉

旨削奪館丈朱君滄起李君雍來爲予失色予曰
何足言因此得奉老母歸殊快卽募小車擬載母
陳恭人馳歸而內閣同鄉張公二水遣人來云勿
亟行且有公竭力揀尚可望也揭稱本卷文理優
長字畫清楷諸卷無出其右者且自引踈失之罪
始得

旨姑不究然璟意却以削奪爲美古人耻不與黨

人身且不顧何有一官其時同得罪者楊公汝成馬公之驥等四人魏璫敗尋亦召歸楊公語予云子知禍所繇乎坐五月間僞生祠事也魏璫懋思祠之建掌院合三科庶常議助工至有以孔子亦獵較爲言者予曰此與獵較不同楊公亦默不應及祠旣建京官吉服趨拜予倡諸庶常曰彼吉服耳吾庶常尚青袍角帶不宜拜遂無一人往拜者楊公謂其時持簿醜金之人皆璫耳目故及於難然都與義命無與士君子遇明夷之世不詭不

隨盡其在我若濟不濟則天也魏璫敗而向被削奪之人槩以忤璫爲名予却羞之聊記于此

庶常給假歸俟下科偕新公散館例也近科始有赴館銷假先散者予自壬戌秋聞先君諱奔歸里居五年丁卯同年李雍來約引新例先散予私念奸璫用事方以出山爲悔且一授職卽當主考一部試錄如何着手因托病力辭每烈日穿朝赴館讀書課文以青袍角帶還往長安東西門班役怨咨謂予愚拙予屢空常晏如也聞東林兄讓菴

及舍弟中陞曰吾有七練以馬練髀以塵練眼以
街道溝練鼻以詩文練腸以貧練骨以長班走館
練性以立定脚跟練品惟於吾毋恭人媿不能備
甘旨吾母顧安之時長跪膝下獻一觴相樂也當
日附璫媚子權寵燭天豈復知有措大哉未幾

聖主龍飛冰消瓦解解望予輩引手不啻涸鱗窮獸之
號于人而業已無及矣予既授職以避北畿典試
遲不卽到任或又咲爲愍然其典試者後俱不免
始服予先見

題魯千巖墨竹

晉人不識竹云是有節藹然竹時見藹不時見也
玉局老人寫竹多成棘妙而不真使舍妙求真與
篋材何異予在京師苦無竹每從友人馮禎卿索
畫本懸之以當真竹取涓數畝在吾座右足矣固
不必効子猷斫籜移鞭費一番安頓也西湖魯孔
孫携竹入閩數爲予作琅玕千尺勢予甚愛之戲
謂孔孫吾武夷玉華清源間是此君閨苑一旦入
子袖中良善慎勿經葛坡使作蛟龍飛去孔孫曰

吾手在乎日在遂徑去

書江山舊吏毛應麟冊

予計偕過九清橋橋尚歸然諸父老置酒其上予
得句云父老有心去後嘗爲東道主湖山如筆分
明畫出宰官清座上傳爲嘉話因念築橋時予在
署中雙鸛來巢爲作二鸛賦 膝下忻然曰孺子
可教也今且四十年而橋亦圯其大半惟彼中諸
父老相念不減桐鄉耳爲之惘然

書朱貞孝事

貞孝名德貞益府輔國將軍常茫第三女祖鎮國

將軍翊鍾益昭王之子宣王潢南之弟也有

賢名嘗彙仁孝皇后訓善內訓

章聖皇太后女訓古列女傳女孝經女誠諸書為

女教大成行世德貞幼淑家訓八歲許儀衛副王

廷卿應襲長子重賢十歲而重賢殤德貞聞計即

素食縞衣繡大士象皈依蚤誦蓮華晚誦金剛如

默有禱及笄求姻者接踵始跪告父母曰女王氏

婦也自重賢死之日而志決矣父母怒責之曰咄咄怪事渠殤且十年何預汝家辭色厲甚德貞志益堅母夫人諭之曰美事也世情所難佳麗人果鐵心腸耶有初鮮終恐貽笑罵耳德貞誓曰必不得爲未亡人不可爲人不如死三日不食彊之食閉戶自經遂無敢復請婚者天啓辛酉秋德貞年十八矣值重賢忌日先數日叩父母爲製服啓

益王廟辭義不回轅廷卿聞而駭使妻李造府懇辭德貞見姑拜且哭剖心英決斷不改移止姑信

宿視若母自爲櫛沐姑亦感動遂以八月二十九日益王遣內監伴送登門德貞乘素車衰絰執杖就位舉哀設奠自製文告重賢曰共伯蚤死共姜守義之死靡他柏舟矢志世有升降心無古今聖經垂訓女史有箴嗟未亡人誕育宗室八歲許婚實有定匹云何不幸夫也遽殤我雖幼小默念綱常祖王好賢父母樂善內則熟聞芳規習見宮闈秦綺永謝鉛華堅持節孝光我國家茲及笄年當以死決籲天叩闈庶幾監察逝不改適從一而

終僉曰孔臧稍慰忡忡登子之堂設子之位寫此血裏傾此血涕甘執婦道事我舅姑他日同穴其無愧乎君子讀此文也曰與柏舟詩並懸日月矣輔國知廷卿貧粧送一如長女且爲置產供朝夕備祭祀於是益王表之曰貞女完人郡縣上其事兩臺以年未及格先行獎勸而引淮藩宗女隆姬例歲給贍米五十石鄒公元標曰知善知惡者良知也爲善去惡者格物也禮壹與之齊終身不改未與齊而改雖從俗亦不爲惡然婚始納采上家

告天地祖宗召諸族戚實有定匹是可改乎此義極精微亦極明白惜乎舉世不知而八歲女子知之其一點真心有目不知有色有耳不知有聲身枯槁不知有世味使爲偉丈夫任道履危深造建豎當不知何似古以節殉夫不少彼皆伉儷情深事變偶逼慷慨就死易也縣君何情之有止此幾希之性不可磨滅耳齊女嫁衛至城門而衛君薨保母曰可以還矣女不聽遂入持三年之喪畢其弟立請曰衛小國也不容二庖請同庖終不聽衛

君愬於齊兄弟皆欲與君女終不聽事與縣君頗類然在國稱女在途稱婦入國稱夫人不可返猶不敢亂也若縣君在可改不可改之間而斷斷不改者格其不正以歸于正也是良知也 國家功令於民間節婦必旌旌必五十待中材則然耳若縣君大貞大孝極奇極難 天潢淑媛可以例拘耶德璟奉使建昌卽與當事言宜亟旌而貞女年方三十有二於格尚早不知此一年足當人千百年也貞女嘗割股療父盱人稱爲貞孝然割股世多有之故予於貞獨詳而以麻姑與貞女爲盱二絕

告 祖母吳太君文

孝孫德璟謹偕兄弟稽首

累封太恭人 特旨旌表九十八齡 祖母貞成

吳太太夫人璟中元夢我 祖母步登高山璟趨

掖之呼酒奉從已復抱我 祖母直上甚喜也又

夢我 父觀察九觀府君乘傳自惠安至鼓吹輿

損甚盛書籍布地萬卷皆以賜璟因念我 祖母

矢節立孤開我百世有大功德於蔣璟等兄弟承

休席芘叨官禁近陳情既不獲遂襄事又已逾期

罪狀萬千比以吾母陳太恭人之喪哀痛骨立
幸畱殘喘而一夜中連得二夢仰知 祖母眷顧
諸孫之深與我 父以書香授璟之意且若示璟
等襄葬吉辰遠來護送 祖母者迴環追憶感愴
良深謹卜今丁丑八月丙申朔巳時奉 祖母于
晉江縣一都蘓安仙景山與 贈公敬齋府君合
葬而先期以七月二十六日壬辰長孫瓚致祭七
日諸孫瑄八日璟九日瓏瑗各致祭其夜辭堂卽
以朔亥子交巽引未時反主行虞祭禮僉謀大吉
庶幾仰藉 鴻慈可幸無憾伏惟 鑒佑崇禎丁
丑秋七月巳丑孫璟謹告

初擬十月朔乙未與八月朔二辰因夢遂卜于
祖母得八月信者八再卜之神有前生陰騭之
語若字字爲祖父母發者兄弟叔姪僉同又幸
得姻友林銓部讓菴相與諏定而有奇合者五
先贈祖塋萬曆癸未相距可五十五年所畱壙
石失其處璟徧求之不得忽一老翁謂幼嘗傭
工記似在東隅一掘得之時巳黃昏喜鵲驟噪

一也山枕紫帽面天馬左右屏帳砂水環抱頗稱勝地而壙久亦懼有意外迨朔子夜開一竅煖氣蒸人比環瑗先馳視則垂珠數百晶潔如玉置少香炭焰大起堪輿家以爲從來未見也環身入其中者三而鵲亦驟噪二也祖母生嘉靖乙未而所奉邀祠后土題主爲大銀臺台石周公光祿勳翀漢林公皆乙未進士陪者爲讓菴林公則生乙未也三公名德海內宗仰又皆有令子以三乙未而爲六十年前乙未事光

重三也族姻以祖母百齡受三封一特旌爲列葆羽燈火有天褒四錫人瑞百齡大節格天陰功裕後及子孫曾四經科甲封旌壽百歲恩光諸竝語風日晴朗還往五十里甚都比事畢入門而後雨已迺驟風四也先觀察府君卜地時地師鶴山夜夢一少年面青曰而瘦謂吾地已受命于神明日審視湏共獎成其日觀察邀之登山地師卽曰不待觀必吉壤也觀察幼孤不識父面歸以問祖母祖母曰少年卽汝父觀察

泣遂定穴比築石桃丙舍上樑時祖母方肅拜
而聞地中鐘鼓自鳴皆以爲吉兆今其塋也夢
中實授之日生而神明歿益靈異五也獨痛祖
母以百歲之人爲七十八年孀幃之守八十三
年而始與贈公同穴其間茹苦含淒何可勝道
雖幸而見子孫曾玄之立而先觀察僅登古稀
諸孫輩才質駑庸無以仰章盛美則不孝之罪
百身莫贖矣書之以懺璟等而且以勗諸子孫

